

दिनांक : 05.03.2026

समय : 18.45 बजे

- गृह राज्य मंत्री जवाहर सिंह बेढम कह्यो-पश्चिमी एशिया मांय चाल रही तणा-तणी बीचे खाड़ी देशां मांय फंस्यो राजस्थान रा लोगां ने हिफाजत सागे पाछे लावण सारू राज्य सरकार सगळा जरूरी जतन कर रही हैं
- भारत अर फिनलैंड पर्यावरण सहयोग, प्रवासन अर गतिशीलता समेत न्यारा-न्यारा हलकां मांय केई करार कीनां
- आई.सी.सी. टी-20 क्रिकेट विश्व कप रा सेमीफाइनल मांय अब ऊं थोड़ी देर पछे भारत अर इंग्लैंड बीचे मुकाबलो व्हेलां
- प्रदेश मांय फागण मांय ई तेज गर्मी - घणखर ठौड़ां पारो सामान्य ऊं 4 ऊं 8 डिग्री सेल्सियस ऊंचो पूग्यो

000

पश्चिमी एशिया मांय चाल रही तणा-तणी बीचे खाड़ी देशां मांय फंस्यो प्रवासी राजस्थानियां ने हिफाजत सागे पाछा लावण सारू राज्य सरकार सगळा जरूरी जतन कर रही हैं गृह राज्य मंत्री जवाहर सिंह बेढम आज विधानसभा परिसर मांय खबरनवीसां ने आ जाणकारी दीनीं वे बतायो के सरकार राज्य रा परदेश मांय फंस्योडा लोगां सागे लगातार सम्पर्क मांय है अर वां ने हिफाजत सागे पाछा लावण सारू सगळा जरूरी जतन कर्या जा रह्या हैं

.....

तणा-तणी रे कारण दुबई मांय फंस ग्या जोधपुर अर बीकानेर केई लोग पाछा आया हैं आं मांय जोधपुर रा एक सौ बीस जणा ई शामिल हैं अ लोग एक धार्मिक आयोजन मांय शामिल व्हेवण सारू 23 फरवरी ने दुबई ग्या हां पाछा आया मनोहर दास बतायो के वां ने 28 फरवरी ने पाछा आवणा हा, पण उड़ानां मांय आयी अड़चन रे कारण नी आ सक्या हां

.....

एक सौ बीस मांय ऊं छिहत्तर जणा कोच्चि अर तीस जणा अहमदाबाद आया जदके बाकी जणा आज सीधा जोधपुर पूग्यां

000

विधानसभा आज राजस्थान जन विश्वास विधेयक-2026 ध्वनिमत ऊं पास कर दीनों इण रो मकसद सरकारी प्रक्रिया ने आसान बणावण सागे कारोबारियां अर जनता ने साता देवणो हैं विधि मंत्री जोगाराम पटेल सदन मांय ई बिल माथे व्ही चर्चा रो जवाब देता थकां कह्यो के ई बिल रे जरिये न्यारा-न्यारा महकमा रा सजा ऊं जुड्या जूना अर बेकार प्रावधान हटायी ज्या हैं वे कह्यो के मामूली तकनीकी उल्लंघनां सारू अब आपराधिक कार्रवाई री बजाय केवल जुर्मानो लगायो जावेलां श्री पटेल कह्यो के राज्य सरकार प्रदेश मांय खेजड़ी ने बचावण सारू बेगो ई करडो बिल लावेलां

00000

खाद्य सुरक्षा योजना रो फायदो लेवण सारू नाम जुडवावण बाबत् पोर्टल हाल ई खुल्योडो हैं जल संसाधन मंत्री सुरेश सिंह रावत आज विधानसभा मांय आ जाणकारी दीनीं प्रश्नकाल रे दौरान पूछी ज्या पूरक सवालां रा जवाब मांय श्री रावत कह्यो के पात्र लोग अर्जी दे र ई योजना रो फायदो लेवण बाबत् नाम जुडवा सके हैं वे बतायो के जयपुर शहर मांय ई साल 26 फरवरी ताई 1 लाख 36 हजार 977 राशन कार्डधारी हैं फरवरी 2024 ऊं हाल ताई जयपुर मांय 84 हजार 574 नाम जोड़ी ज्या है, जद के 1 लाख 27 हजार 286 नाम हटायी ज्या हैं मंत्री बतायो के योजना रो फायदो लेवण सारू तीन महीना मांय ई-केवाईसी करवावणो जरूरी हैं ई-केवाईसी नी करावण वाळां रा नाम लिस्ट ऊं हटायी ज्या हैं

000

नगरीय विकास मंत्री झाबर सिंह खर्वा आज विधानसभा मांय बतायो के अजमेर नगर निगम कानी ऊं लारला छह महीना मांय जारी करी ज्या पट्टां री जांच करी जावेलां वे अजमेर रा जिला कलेक्टर ने दो सप्ताह मांय ई बारा मांय रपट देवण रा हुकम दीना हैं सदन मांय आ जाणकारी शिव रा विधायक रविन्द्र सिंह भाटी कानी ऊं ध्यानाकर्षण प्रस्ताव रे जरिये उठायी ज्या मामला रा जवाब मांय दीरीजीं श्री खर्वा बतायो के नियम विरुद्ध पट्टा जारी करण रा मामला मांय शामिल चार कर्मचारियां ने हटा दिया ज्या हैं जिला

कलेक्टर लोकबंध्यु अब लारला छह महीना रे दौरान जारी करी ज्या सगळा पट्टा री जांच कर र विगतवार रपट विभाग ने सूपेलां

0000

भारत अर फिनलैंड बीचे आज नई दिल्ली मांय पर्यावरण, प्रवासन अर सांख्यिकी समेत न्यारा—न्यारा हलकां ऊं जुझ्या केई करार माथे सही करीजीं प्रधानमंत्री नरेन्द्र मोदी भारत रा दौरा सारू पधार्या फिनलैंड रा राष्ट्रपति अलेक्जेंडर स्टब सागे दोन्यू देशां बीचे आपसी मदद और बधावण रा बारा मांय बातचीत कीनीं प्रधानमंत्री कहयो के मौजूदा दौर मांय दुनिया अस्थिरता अर अनिश्चितता रो सामो कर रही हैं वे दुनिया रा न्यारा—न्यारा मंचां माथे आपसी सहयोग और बधावण माथे जोर दीनों

0000

गृह मंत्री अमित शाह आज नई दिल्ली मांय साल 2027 री जनगणना सारू चार डिजिटल उपकरणां री सरूआत कीनीं श्री शाह महिला अर पुरुष रा प्रतीक शुभंकर 'प्रगति' अर 'विकास' रो ई अनावरण कीनों लॉन्च करी ज्या उपकरणां मांय जनगणना प्रबंधन अर निगरानी पोर्टल, स्व-गणना पोर्टल, हाउसलिरिंग ब्लॉक क्रिएटर अर एच-एल-ओ मोबाइल एप्लिकेशन शामिल हैं अ डिजिटल प्लेटफॉर्म उन्नत कंप्यूटिंग विकास केंद्र कानी ऊं विकसित करी ज्या हैं ध्यानजोग है के साल 2027 री जनगणना दो दौर मांय व्हेलां ओ पहली दफा वहेला जद के जनगणना पूरी तरह डिजिटल तरीका ऊं व्हेला, जिण मांय जनता कने खुद जाणकारी दर्ज करण यानि 'स्व-गणना' रो विकल्प ई रेहवेलां

0000

प्रदेश मांय राशन मुहैया करावण रो काम साफगोई सागे आसान बणावण सारू खाद्य विभाग री ओर ऊं नुवी व्यवस्था करी जा रही हैं ई रा तैत तौल मशीनां ने ब्लूटूथ रे जरिए ऑनलाइन तरीका ऊं जोड़ी जा रही हैं कोटपूतली-बहरोड़ ज़िला मांय इण री जांच करी जा रही है, जिण रा नतीजां पाछे पूरा राज्य मांय लागू करी जावेलां जिला रसद अधिकारी शशि शेखर शर्मा बतायो के नुवी व्यवस्था मांय राशन रो वजन तैय मात्रा मांय व्हेतां ई मशीन ऊं आप-ऊं-आप पर्ची निकळ जावेलां

000

आईसीसी टी-20 विश्व कप क्रिकेट होड़ रो दूजो सेमीफाइनल मुकाबलो आज भारत अर इंग्लैंड बीचे व्हे रह्यो हैं इंग्लैंड टॉस जीत र भारत ने पैली बल्लेबाजी करण सारू बुलायो हैं मुंबई रा वानखेडे स्टेडियम मांय अब ऊं थोड़ी देर पछे ओ मैच सरू व्हे रह्यो हैं इण ऊं पैली होड़ रा पहला सेमीफाइनल मुकाबला मांय काल न्यूजीलैंड दक्षिण अफ्रीका ने 9 विकेट ऊं शिकस्त दे र फाइनल मांय ठौड़ बणायीं

0000

प्रदेश मांय फागण महीना मांय घणखर ठौड़ां दिन अर रात री बगत पारो लगातार चढ़ रह्यो हैं केई ज़िलां मांय तापमान सामान्य ऊं चार ऊं आठ डिग्री सेल्सियस ऊंचो चाल रह्यो हैं राज्य रा आतूणी हलकां मांय दिन री बगत तापमान 35 डिग्री सेल्सियस ने पार कर ग्यो हैं बीती रात बाड़मेर मांय 23, फलौदी, बीकानेर, जैसलमेर अर जयपुर मांय 20 डिग्री सेल्सियस ऊं ऊंचो तापमान दर्ज करी ज्यों पाली मांय सब ऊं कम आठ दशमलव आठ डिग्री सेल्सियस तापमान नापी ज्यों फतेहपुर, करौली, दौसा अर सिरोही समेत कठे-कठे रात री बगत तापमान पंद्रह डिग्री सेल्सियस ऊं नीचे रह्यो मांसम विभाग रे मुजब राज्य मांय आवताएक सप्ताह रे दौरान घणखर हलकां मांय अधिकतम तापमान सामान्य ऊं 4 ऊं 8 डिग्री सेल्सियस ऊंचो रेहवण रा आसार हैं दक्षिण-पश्चिमी हलकां मांय 8 ऊं 10 मार्च रे दौरान कठे-कठे अधिकतम तापमान 40 डिग्री सेल्सियस दर्ज व्हेवण रा आसार हैं

0000

प्रदेश रा केई ज़िलां मांय आज ग्राम पंचायत लेवल माथे जनसुणवाई करी ज्यों चूरू ज़िला मांय गांव वाळां रा सुबीता अर समस्यावां ऊं जुड़ी सुणवाई कर र मौके ई निपटारो करी ज्यों करौली ज़िला मांय कलेक्टर नीलाभ सक्सेना अकबरपुर अर ढिंढोरा पंचायतां रो दौरो कर र समस्यावां सुणीं वे न्यारा—न्यारा महकमां ऊं जुझ्या 28 मामलां री सुणवाई र अहलकारां ने ज़रूरी हुकम दीनां

000

प्रदेश मांय चाल रह्या महिला दिवस सप्ताह रा तैत न्यारा—न्यारा ज़िलां मांय कार्यशालावां राखी जा रही हैं जैसलमेर मांय महिला अधिकारिता महकमा कानी ऊं राखी ज्यी कार्यशाला मांय लाडो प्रोत्साहन योजना अर बालपणा मांय ब्याह रोकण रा बारा मांय जाणकारी दीरीजी अर टाबरियां री भणार्ई-लिखाई अर वां रा बारा मांय समाज री सोच ऊं जुड़ी चर्चा करी ज्यों भीलवाड़ा मांय ई विभागीय योजनावां रा प्रचार-प्रसार सारू राखी ज्यी कार्यशाला मांय शिक्षा सेतु अर मुख्यमंत्री नारी शक्ति उद्यम प्रोत्साहन योजना समेत न्यारी—न्यारी योजनावां रा बारा मांय जाणकारी दीरीजीं

000